

Kinguaassiuutitigut meeqqanik atonerluisoqarsimatillugu pineqaatissiisarnerup sakkortusinissaanik Nunatsinni unnerluussisussaataasut kaammattorneqarnissaat siunertaralugu Naalagaaffeqatigiinnermi oqartussaasut saaffigineqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Sofia Geisler, Inuit Ataqtigiit)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Aappassaaneerpeqarnera

Inatsisartut aalajangiiffigisassaattut siunnersuutip massuma peqqissaartumik suliaqarsimanagera pillugu Inatsisinut Ataatsimiititaliaq Naalakkersuisut qutsaviginarpat.

Siunnersuutip siullermeerpeqarnerani meeqqanik atonerluisoqarsimatillugu pineqaatissiisarnerup sakkortussusiata sukannernerulersinneqarnissaanik siunnersuummi siunertaralugu nalinginnaasumik tapersorneqarmat Naalakkersuisut nuannaarutigaa. Ingammik suliani taamaattuni pineqaatissiisarnerup qaffanneqarnissaa Naalakkersuisut tamakkiisumik isumaqataaffigaa.

Kisianni pinerluuteqarnerni ilungersunartuni pineqaatissiisarnerup qaffasissusaata nalinginnaasumik sukannernerulersinneqarnissaanik, matumani aamma inersimasut kinguaassiuutitigut atonerlunneqartarnerat toqutsinerillu pineqartillugit, tassami ullumikkut toqutsisoqarsimatillugu, immikkut ittumik sukannerluinnartumik pisoqarsimatinnagu, pineqaatissiissut ukiunik 6-nik sivisussuseqartarmat, Inatsisartut Naalakkersuisunik isumaqataannissaat Naalakkersuisut neriuutigisimagaluarpaa. Allanguutissatut siunnersuutip massuma akuersissutigineqarnissaanik ataatsimiititaliap itigartitsissuteqarnera, pineqaatissiissutit qaffasinnerpaaffissaasa qaffanneqartariaqarnerannik isumaqataanninnertut Naalakkersuisut paasinngilaat, kisiannili saqqummiunneqaqqaartumik tunngaviatigut allanguinninnissamik piumasqaammik naammassinninninnera pissutigalugu ataatsimiititaliamit allanguutissatut siunnersuut itigartinneqartoq paasillugu.

Taamaalilluni aalajangiiffigisassatut siunnersuut malillugu meeqqanik kinguaassiuutitigut atonerluisoqartillugu pineqaatissiisarnerit sukannernerulersinneqarnissaannik ujartueqqullugit Kalaallit Nunaanni unnerluussisussaataasut piffissaq qaninnerpaaq atorlugu peqquneqarnissaat Naalakkersuisut Naalagaaffeqatigiinni oqartussaasunut kaammattuutigissavaat. Tamatuma peqatigisaanik pinerluttulerinnermi inatsimmi § 147 malillugu pineqaatissiinerup qaffasinnerpaaffiata qaffanneqarnissaa pillugu inatsisunik atuutsitsinnermut ministerimik isumaqatiginninniarnaq Naalakkersuisut ingerlateqqissavaat, taamaalilluni ilungersunartunik pinerluttoqarsimatillugu pineqaatissiisarnerit ullumimut naleqqiullugu sukannernerulernissaat periarfissannngorniassamat. Allanguutissatut siunnersuut tamakkununga tunngasoq, naammassineqarsimaleriarpat Inatsisartunut saqqummiunneqarumaarpoq.

UPA2010/19-imi Inatsisartut aalajangiussaata ataatimiititaliap eqqaamaqqugaa Naalakkersuisut maluginiarpaattaaq, tassani Naalakkersuisut meeqqanik kinguaassiuutitigut atonerluineq pinngitsaaliillunilu atoqatiginninneq pissutigalugit inuit inissiisarfinnut inissinneqarnissamik eqqartuunneqarsimasut, pinerlutsaaliuinermik siunnerfilinnik suliniutinik pineqaatissinneqarnerminnut atatillugu katsorsarneqarnissaat pillugit, matumani katsorsaanissamik neqeroorutit naleqquttut ilanngullugit, Naalakkersuisut qallunaat naalakkersuisuinut oqaloqatiginninnernik aallartitsinissaannik Inatsisartut kissaateqarnerat ataatimiititaliap naammassineqarsimanngitsutut isigimmagu pissutaavoq. Aamma peqatigisaanik eqqugaasup inatsisitigut inissisimanerata patajaallisarneqarnissaata ukkatarineqartarnissaanik eqqartuussiveqarneq pillugu ataatimiititaliarsuup siunnersuutaa ataatimiititaliap innersuussutigaa.

Tassunga atatillugu Inatsisartunit UPA2019-imi peqquneqarnikkut qallunaat/kalaallit Danmarkimit ikiorneqarnissaq pillugu suleqatigiinnerannut atatillugu, inatsisinik atuutsitsinermut ministerimut Nick Hækkerup-imut peqqusinermi 28. juni 2019-imeersumi, - pineqaatissiisarnerup qaffanneqarnissaanik peqqusinerup saniatigut – immikkut ittumik eqqunngitsuliortartut innuttaasunut ilaalerseqqinnissaat anguniarlugu katsorsarneqarnissannik peqqusineq, soorlu aamma eqqugaasut inissisimanerisa patajaallisarneqarnissaat pillugu peqqusineq tassaniittoq, Naalakkersuisut innersuussutigissavaat.

Eqqunngitsuliortartut katsorsarneqarnissaat pillugu oqaluuserinninneq Kalaallit Nunaanni Eqqartuussiveqarneq pillugu Siunnersuisoqatigiit ataatimiinnissaanni aggersumi aammattaaq sammineqassaaq.

Tamanna tunngavigalugu kalaallit nunaanni isertitsivinni eqqunngitsuliortartut katsorsarneqarnissaat pillugu aamma eqqugaasut inatsisitigut inissisimanerisa patajaallisarneqarnissaat pillugit oqallinnerit aallartereersut Naalakkersuisut isumaqarput. Kingulleq pillugu inatsisissatut siunnersuummut missingiut massakkorluinnaq inatsisinik atuutsitsinermut ministeriaqarfimmit suliarineqaleruttorpoq aamma Inatsisartunut piaartumi saqqummiunneqarnissaa naatsorsuutigineqarpoq.

Naalakkersuisut taama oqaaseqarlutik ataatimiititaliap innersuussutaa tusaatissatut tiguaat.